



Inatsisartunut ilaasortaq
Harald Bianco
-/her

Tasiilami eqqaanilu imigassat kimittuut nioqqutigeqqusaannginnerat pillugu Inatsisartunut ilaasortap Harald Biancop § 37 naapertorlugu apeqqutaanut akissut

Tasiilami eqqaanilu imigassat kimittuut nioqqutigeqqusaannginnerat pillugu Inatsisartunut ilaasortap apeqqutaanut qujavunga.

Apeqqut imaappoq:

Tasiilami eqqaanilu imigassat kimittuut nioqqutigeqqusaannginnerat Naalakkersuisut qanoq iliuuseqarfiginiarpaat. Aaqqissuussineq allanngortinnialersaapaat?

Apeqqummi eqqaaneqarpoq taamatut inerteqquteqarneq Tunumi Kitaanilu assigiinngisinerusoq. Tassunga oqaatigineqarsinnaavoq aamma Kitaata ilaani, soorlu Qaanaami eqqaanilu, imigassat kimittuut tunisaanerisa inerteqqutaanerat inatsisitigut aalajangersagaasoq.

Kitaani Tunumilu eqqaaneqartutut inerteqquteqarnermut tunuliaqutaapput pissutsit ajortut arlallit, tamakkulu ilaat inerteqquteqarnermik inatsisitigut aalajangersaasoqarnissaa-nik kommunalbestyrelsit kissaateqarnerannik malitseqartinneqarput. Tassunga atatillugu oqaatigineqassaaq nunatsinni kommunini kommunalbestyrelsit najukkaminni imigassanik kimittuunik tuniniaasarneq sassaallertarnerlu pillugit inerteqquteqarnissaminnut periarfissaqarmata.

Tunumi Kitaaniluunniit imigassanik kimittuunik tuniniaasarneq sassaallertarnerlu pillugit killilersuinerup atorunnaarsinneqarnissaa-nik Naalakkersuisut maannakkuugallartoq pilersaaruteqanngillat. Killilersuinerup unitsinneqarnissaa pillugu kommunalbestyrelsit kissaateqarnerannik Naalakkersuisut tigusaqassagaluarunik, Naalakkersuisut tamanna pillugu oqaloqatigiinnissamut soorunami ammajumaarput.

Taama saaffiginnissuteqannginnermi sumiiffiit ataasiakkaat kimittuunik imigassaarniarnerup ammaanenaqqinnerata kinguneriumaagaasa isumaliutigineqareersimanissaat, ajornartorsiutaajumaartussatullu naatsorsuutigisariallit anigorniarnissaannut iliuusissanik pilersaarusiorsimanissaat, Naalakkersuisut naatsorsuutigaat. Pissusilersoriaatsip allanngornera politiit inunnillu isumaginnittoqarfiup matoqqatitsinerup nalaani pitsannguuteqarfiusutut uppersaateqarfigisinnaasaat – ilaatigut persuttaasarneq, angerlarsimaffinni eqqissiviilliornerit, meeqqat inuusuttullu atugarisaannik sunniisarnerit il.il. matumani eqqarsaatigineqarput.

1. marts 2012
Sagsnr. 2012-062347
Dok. Nr. 835019

Postboks 1160
Tlf: 34 50 00
Fax: 32 55 05
3900 Nuuk
Email: pn@nanoq.gl
www.nanoq.gl

Aammattaaq § 37 naapertorlugu apeqquummut assingusumut Peqqissutsimut Naalak-
kersuisoqarfiup akissutaa innersuussutigineqarpoq, tak. § 37 apeqquut nr. 27/2011.

Inussiarnersumik inuulluaqqusillunga



Agathe Fontain



Tasiilaq, 16. februar 2012

Inatsisartut Suleriaasianni § 37 naapertorlugu matumuuna imaattunik Naalakkersuisunut apeqquteqarpunga:

Tasiilami eqqaanilu imigassat kimittuut nioqqutigeqqusaannginnerat Naalakkersuisut qanoq iliuuseqarfiginiarpaat. Aaqqissuussineq allanngortinnialersarpaat?

(Inatsisartunut ilaasortaq Harald Bianco, Inuit Ataqatigiit)

Tunngavilersuut:

Tasiilami eqqaanilu imigassat kimittuut nioqqutaannginnerisa oqallisaanerat ingerlaqqippoq. Inatsisartunut ilaasortaq Justus Hansen demokratineersoq aviisi Sermitsiaq nr. 5-imi allaaserisaqaqqippoq, ilaatigut kitaani illoqqarfinnut sanilliulluta immikkoortitsisumik nipilimmik oqariartoqqimmat, aammalu imigassaq pissutaalluni politiit suliaqartarnerat assersuutigalugu Nuummi Tasiilamut sanilliullugu ulapaartarnerujussuunerat tikkuarlugu.

Kitaaniittarluni maluginngitsuugassaangilaq, imigassaq pissutaalluni ajornartorsiutit Tasiilamut sanilliukkaanni ilaatigut ingasannerujussuusartut. Tamanna Tunumi Kitaanilu pissutsinik takunnittut nalunngilaat.

Tamakku isigitillugit eqqarsaqqajaanartarpoq, sooruna Tunumi immikkut isigineqartugut, sooruna immikkut pineqartugut. Imigassanik kimittuunik matusinissamut nalilersuutaasinnaasut assigiimmik naliliissutigisassagutsigit, taava allaqqunneqarsinnaanngitsumik periarfissat marluinnaapput: tassalu Kitaani aamma matusisoqartariaqarpoq, taamaassanngippat Tunumi imigassat kimittuut ammaateqqinneqartariaqarput. Taava tassani immikkoortitsineq piunnaassaaq.